



Friluftsrådet Vest
Postboks 63
5575 AKSDAL

Trondheim, 18.04.2018

Dykkar ref.:
[Dykkar ref.]

Vår ref. (bes oppgitt ved svar):
2018/1374

Sakshandsamar:
Heidi Grete Betten

Statleg medverknad til sikring og tilrettelegging av Siggjo parkeringsareal gnr 9 bnr 145 i Bømlo kommune som friluftslivsområde for ålmenta

Vi viser til friluftsrådet sin søknad av 15.01.2018 og uttale frå fylkeskommunen i oversending av 16.04.2018. Vi viser og til oppdaterte kostnadstal for opparbeiding av parkeringsarealet frå dykk sendt oss i e-post av 13.04.2018.

Friluftsrådet søkjer om statleg medverknad til erverv av eigedomen og til grunnleggande istandsetting, totalt kr 1.369.750,-.

Sikring og grunnleggande istandsetting av Siggjo parkeringsareal fyller dei kriteria som er sett for tildeling av statlege midlar.

Miljødirektoratet gir med dette tilsegn om inntil **kr 729.125,-** inklusive omkostningar til sikring og istandsetting av dette arealet til friluftslivsområde for ålmenta. Tilsegna dekkjer sikringskostnadene og 50% av kostnadene ved omsøkte istandsettingstiltak. Vi føresett at eventuelle nødvendige løyve frå offentleg myndigheit til å utføra istandsettingstiltaka blir innhenta av tiltakshavar.

Grunngjeving for tilsegna

Siggjo med si vidstrakte utsikt over store delar av Sunnhordaland er eit turmål som tiltrekkjer seg turgåarar både frå lokalmiljøet og regionen. Intensiv bruk har ført både til behov for å leggje til rette med meir parkering og til behov for å handtere slitasje på og oppgradere stiar, bruer og trapper. Det siste har Friluftsrådet Vest søkt statleg medverknad til i ein eigen søknad no i 2018.

Det blir søkt sikring ved erverv av eit areal på om lag 4,2 daa som skal nyttast til parkering. Grunnprisen er avtalt til rundsum kr. 30.000,-. I tillegg er det avtalt at kjøpar dekkjer kostnader på kr. 20.000,- ved gjennomført opparbeiding av avkøyring frå riksveg. Omkostningar er estimert til kr 28.500,-. Sikringskostnadene er slik totalt kr 78.500,-.

Hordaland fylkeskommune understrekar behovet for sikring og tilrår søknaden innfridd som omsøkt.

Statlege midlar til tilrettelegging av sikra friluftsområde blir fyrst og fremst tildelt frå fylkeskommunen. I samband med sikring av område kan direktoratet likevel enkelte gongar medverke økonomisk til grunnleggande istandsetting som blir vurdert som nødvendig for at området skal vere tilgjengeleg for ålmenta. Direktoratet sitt høve til å medverke til denne type tiltak vil vere avhengig av budsjettsituasjonen. I denne saka vil informasjonstavle, opparbeiding av arealet og oppsetting av toalett vere ein del av den grunnleggande istandsettinga som i større grad vil gjere området tilgjengeleg for publikum. Kostnadene ved dette blir sett på som ein del av dei samla

sikringskostnadene som staten i denne saka kan medverke til med ei støtte på kr 10.000,- til informasjonstavle og ved å dekkje inntil 50 % (dvs. kr 640.625,-) av oppgjevne kostnader ved opparbeiding av parkeringsarealet og oppsetting av toalett (høvesvis kr 1.029.750,- og kr 251.500,-).

Heimelshavar

Heimelshavar etter gjennomført sikring blir Friluftsrådet Vest.

Utbetaling

Utbetaling av tilsegna kan gjerast når vi har teke imot dette:

1. Kopi av tinglyst skøyte
2. Panteattest som viser at eigedomen er fri for økonomiske hefte og andre tinglyste hefte som kan hindre eller vanskeleggjere utnyttinga av eigedomen til friluftslivsføremål.
3. Matrikkelutskrifter med tilsvarande opplysningar som i målebrev.
4. Grensene for området levert på digital form (til dømes etter oppmåling), i standard kartformat (SOSI). SOSI-fila skal vise den ytre grensa til det sikra friluftslivsområdet og elles vera reinska for andre opplysningar (som interne eigedomsgrenser, høgdekurver, bygningar osv.)
5. Tinglyst fråsegn om at eigedomen ikkje kan nyttast til anna enn friluftslivsføremål for ålmenta utan samtykke frå staten v/Miljødirektoratet. Direktoratet sitt føretaksnummer er 999 601 391.
6. Stadfesting av at istandsettingstiltaka er utført, samt rekneskapsoppstilling over dei ulike delkostnadene. I rekneskapsoppstillinga skal ev meirverdiavgift vere trekt ifrå. Rekneskapsoppstillinga skal vere stempla og signert av person med mynde i kommunen/friluftsrådet.
7. Ein forvaltningsplan som viser planlagde tilretteleggingstiltak i området. Mal for forvaltningsplan er lagt ut på Miljødirektoratet sine nettsider.

Vi gjer merksam på at tilsegna vil bli trekt dersom saka ikkje er avslutta innan 15.08.2019.

Vi ber om at ein held dialog med Miljødirektoratet under gjennomføring av saka, dersom det oppstår tvil om føresetnadene for tilsegna kan vere endra. Det kan til dømes gjelde ved endringar av kostnader, vederlag, arealstorleik og vilkår i avtalar som blir inngått.

Miljødirektoratet og/eller Riksrevisjonen kan sette i verk kontroll av om midlane er nytta i samsvar med føresetnadene. Vi føresett at kostnadene blir ført slik at det er mogleg å ta ut eit separat rekneskap for arbeida som er utført.

Informasjonstavle

Informasjon er eit viktig tilretteleggingstiltak i statleg sikra friluftslivsområde. For at fleire område skal bli tilrettelagt med informasjonstavler, samt for å sikre at informasjonen om statleg sikra område får eit einskapleg og gjenkjenneleg uttrykk, har Miljødirektoratet utvikla ein eigen grafisk profil for desse områda. Ta ev. kontakt med Miljødirektoratet for nærare informasjon om malen.

Rettleiing om forvaltninga

DN-handbok nr. 30-2011 "Forvaltning av statlig sikrede friluftslivsområder" viser friluftsrådet sitt ansvar ved sikring av område ved hjelp av statleg medverknad, samt ansvar når det gjeld drift og tilsyn av desse friluftslivsområda. Vi gjer merksam på at ansvar for drift blant anna omfattar ansvar for normale driftsutgifter knytt til området (f. eks. kommunale avgifter, straum, eigedomsskatt, utgifter ein får som part i veglag ol). Det er ein føresetnad for tilsegna at friluftsrådet tek på seg dette ansvaret. Handboka er publisert på direktoratet sine nettsider.

Vi føresett at eventuell opparbeiding skjer på ein naturvennleg måte, jf. prinsipp og råd omtala i DN-handbok nr. 27-2006 "Naturvennlig tilrettelegging for friluftsliv". Handboka er publisert på direktoratet sine nettsider.

Vidare blir det føresett at naturmangfaldet blir forvalta i medhald av naturmangfaldloven sitt føremål, forvaltningsmål, prinsipp og plikt til aktsemd, jf loven kap 1 og 2.

Helsing
Miljødirektoratet

Dette dokumentet er elektronisk godkjend

Terje Qvam
seksjonsleiar

Heidi Grete Betten
seniorrådgjevar

Tenk miljø - velg digital postkasse frå e-Boks eller Digipost på www.norge.no.

Kopi til:

Bømlo kommune	Kommunehuset	5430	Bremnes
Hordaland fylkeskommune	Boks 7900	5020	Bergen
Fylkesmannen i Hordaland	Postboks 7310	5020	Bergen